

Date – 05/08/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. ZPM Thalai General Headquarter's Aizawl ten vawiin khan Sairang leh Kawnpui inkar kawng chhe lai siam turin an hnatlang .
- 2. Vairengte leh Aizawl inkar kawngchhia chak zawka thawm a nih theih nana tlan chawlh puang mek Lirthei a Eizawng Pawl Hrang Hrang te chuan fur laia innawr vak ngai tawh lo turin sorkar chu inhmakhawsuih tura an duh thu an sawi.
- 3. Parliament chuan Manipur-a thla ruk dang Presidents rule puan chhunzawm rawtna a pawm
- 4. Prime Minister Narendra Modia leh Philippines President Ferdinand Romualdez Marcos Jr.te chu vawiin khan New Delhi ah an inkawm



ROAD CONDITION

ZPM Thalai General Headquarter's Aizawl ten vawiin khan Sairang leh Kawnpui inkar kawng chhe lai siam turin an hnatlang a, Sairang, Khamrang leh Mualkhang a tlawmngai pawl hrang hrang te hnatlang in an chhuak baw a ni.

An thuchhuaha an tarlan danin kawng siam hna hi PWD Minister Pu Vanlalhlana leh PWD E-in-C Pu H Zoramliana te'n riah chilhin an vil mek a, ZPM Thalai hnatlang hi an President, MLA Pu Jeje Lalpekhlua hovin an thawk chhuak a ni.

Tun dinhmunah Sairang - Kawnpui inkarah motor tluk theihna tur khawp a khuar chhia a awm tawh lo nia an hmuh thu ZPM Thalai thuchhuah chuan a sawi.

Hetihlai hian, Eptu Party ten ZPM kaihhruai sorkar inthlahdah avanga Mizoram chak laklurna kawngpui chhia in Mizoram ei leh bar zawnna kawngah harsatna namenlo a thlen an ti a, thla 7 chhungin GST pawh a tlahniam zawngin a la kal zel an ti.

Akashvani News Aizawl zawhna chhangin MNF Publicity Board Vice Chairman Pu J Malsawmzuala Vanchhawng chuan kumin ang reng renga kawng chhiat nasat tum leh chumi avanga mipuiten an tawrh nasat tum a la thleng ngai lo a ti a, tuna kawng chhe zual, lirthei tam tak a tan vanga mipuiin harsatna namen lo an tawhna chhan lian ber Kawnpui-New Khamrang chu nikum lamah pawh mipuiten nasa taka an tawrh chhan a lo ni tawh tih sawiin, kum 2024 September thlaah sorkarin Contractor bantirin, a security pawh cheng nuai 35.37 lai a chhuhsak a, amaherawhchu khati khawpa kawng chhe nasa tawh si kha, contractor kut atanga laksak anih hnuah pawh thal chhung zawngin engmah ti mumal lovin Sorkar-in a thlir a, a mutthluk san chhunzawm leh avangin kuminah harsatna namen lo state in a tawk nawn leh mek a ni a ti.

ZPM sorkarin kawng siamna tur bika chhiah a lak Road Maintenance Cess tling khawm pawh June thla thleng khan cheng vbc 25 nuai 54 sing 5 & 7,771 zet a tling tawh tih sawiin sum nei nei reng chung si leh kawng a chhe nasa hle dawn tih hre lawk reng chung sia sorkarin mipuite tawrhna a thlentir tho mai chu hriatthiam harsa a tih thu a sawi a, Mizoram economy a hniam phah a, thla 7 chhung a zawn zatin Mizoram GST lakkhawm chu a tla hniam a, sumdawngten bungrua an ti thleng mumal thei lo a, bawngnhute a vang a, nitin mamawh indaih lohna a thleng mek a, in sakna bungrua a awm loh avangin inhlawhfa tam tak, thawh tur nei lovin an awm a, hei hian state economy tlahniam mek nasa takin a belhchhah mek a ti a.

Hetihlaia sorkar hotu thenkhatin mawhpuh tur dang a dap kual phei hi chu mipui zah lohna a tling a, a vanduaithlak tak zet a ni, a ti.

Congress Treasurer Dr Lalmalsawma Nghaka pawhin tunlai kawngchhia chu sumdawngte bakah lirtheia eizawng leh mipui nawlpuiin an tuar tawh hle a ti a. Hei hian Mizoram economy a nghawng lo thei lo tih sawiin, thla 8 dawn lai chu Mizoram GST lakkhawm chu a tlahniam chak hle a, thla thenkhatah phei chuan zaa 30 dawn ten a tlahniam tih sawiin, hei hian mipui a nghawng hle a ti.

Mizoram sorkar chuan thal lai khan kawngpui pawimawh hi ngaihtuah ni se tun ang hian an buai a rin lo thu a sawi a, Mizoram hmun dang Mamit, Khawhruhlian leh Thenzawl atanga Lunglei panna kawngah te pawh lirthei tan tlan a hrehawm hle tih sawiin, hei vang hian thil phur man a to phah vek a, hei hian mipui nawlpuite chu a nghawng ber thin tih sorkar chuan hre Chiang se a duh tih a sawi.

BJP Mizoram Joint Treasurer F Lalremsangi chuan nikum lamah Cyclone Remal vanga Mizoram hmun hrang hrang inkalpawh thei lova an awm avangin kuminah chuan Mizoram sorkar chuan inpuahchahna tha tak nen furpui a hmachhawn an beisei laiin, Mizoram chaw lakluhna kawng ber, Kawnpui to Khamrang kawng, Silchar atanga Mizorama lirthei luhna chhe lutuk leh inpuhmawhna thlengte chu pawl an ti hle tih a sawi a, Mizorama hmasawwna ruhrel te chu sorkar laipui atanga lut ni mah se, a enkawl hna chu Mizoram sorkar tihtur pawimawh tak a ni a ti a, vawiin thlenga kawngpui tha taka siam a la ni lo chu zahthlak a tih thu a sawi. Mizoram a la intodelh loh em avangin mipuite zingah ei leh in tur nei mumal tawh lo an awm a nih chuan a tanpui turin BJP a inpeih reng a ti a, ram hruaitu atana MLA thlan tlin te bakah party hrang hrangte chu sorkarna siam thlahlel ringawt lovin mipui tana ding tlat a, kawngpui pawimawh te a that theih nan tangruala thawk ho tura a duh thu a sawi a ni.

<><><>

COMMERCIAL VEHICLES PR

Vairengte leh Aizawl inkar kawngchhia chak zawka thawm a nih theih nana tlan chawlh puang mek Lirthei a Eizawng Pawl Hrang Hrang te chuan vawiin khan Joint Committee neiin hun lokal leh turah fur laia innawr vak ngai tawh lo turin sorkar chuan inhmakhawsuih nachang hre tawh se an duh tih an sawi.

Committee thuchhuak chuan, Sairang leh Vairengte inkar kawng pawh TLAN CHAWLH puan hnan ngai khawp a hma an la chak lo chu a pawl tak zet a, tullovah Lirthei a eizawng te leh mipui a tawrhna a thleng hi Lirthei a eizawng pawl hrang hrang te Joint Committee chuan a pawl an ti tak zet tih an sawi a ni.

Lirthei a eizawng pawl hrang hrang te Joint Committee chuan Sorkar hmalakna hi naktukah an en dawn tih an sawi bawk a. An thil hmuh a zirin an kal zel dan tur pawh a tul angin an ngaihtuah zel ang an ti a, Helai a hmalakna hi an vil zui reng dawn an ti a ni.

Lirtheia eizawng pawl Chief Convener Pu Robert Lalrinawma chuan sorkarin kawng tha zawk a siam theihna tura Lirthei Tlan chawlh an puan avanga ni 2\1 chhung an ding ringawt pawh lirtheia eizawngte tan chuan channa nasa tak a ni a ti a, an eizawwna a tawp rih ang a ni tih sawiin, Loan rul mek te tan ni khat lek din pawh a uihawm a, loh theih loh a an din a ngaih laiin an loan erawh a pung zel tho si chu an harsatna tawh lian tak te zing a mi a ni a ti a, hei bakah hian bungraw lirthei an tlan loh avangin Mizoram chhungah bungrua a van phah a, chu chuan mipuiah harsatna a thlen phah chu a pawl an ti hle tih a sawi.

(PR)

<><><>

GOVERNOR

Larsap Gen Retd VK Singh-a'n Mizoram University-in hun reilote chhunga NAAC A+ Grade a dawng thei leh India hmarchhak bakah ram puma zirna tha zinga chhiar tel a ni chu chhuanawm a tih thu a sawi.

National Assessment and Accreditation Council (NAAC)-in tunhnaia zirchianna a tihchhuaha Mizoram University (MZU) in A+ Grade (CGPA 3.30) a hmuh thar, vawiina MZU Auditorium-a lawmnaah Chief Rector, Larsap VK Singh chuan thusawiin University la naupang tak, kum 2000 a din, kum 2001 a kalpui tan MZU in hun reilote chhunga hlawhtlinna hrang hrang a hmu leh India hmarchhak bakah ram puma zirna tha zinga chhiar tel a ni chu chhuanawm a tih thu leh a lawmpui thu a sawi a. NIRF-in India ram University tha zual 100 a thlan chhuah zinga MZU a lang pha char char leh tunhnaia 77-na dinhmun a hauhte, Central University bik inelna IIRF tehnaah 15-na dinhmun a hauh phate chu chhuanawm a tih thu a sawi a. Hmasawwna tur tam tak a la awm thu leh endikna neih leh hunah tun aia result tha zawk an neih ngei a beisei thu sawiin, tumna tak tak neia hmasawwna lian zawk ngaihtuah phawt chuan hlawhtlinna an chang thei a ni, a ti.

Larsap chuan MZU in hmasawwna a hmuh hrang hrangte tarlangin, National Education Policy 2020 leh Academic Bank of Credits tha taka kalpui a nite, research publication-ah h-index 98 a hmu leh patent 46 lai a neite, MOOCs leh SWAYAM hnuaia hmarchhak state zinga online course kalpui hmasa ber a ni thei leh DRDO Industry-Academia Center of Excellence nei chhun a nite chu fakawm a tih thu a sawi a. Vohbikte tana nelawm leh leilung leh nungchate humhimna tha tak campus an neite, zirna piah lama hmalakna nung tha tak tak an kalpui thinte chu lawmawm a tih thu sawiin, India ram hmun hrang hrang bakah ram dang 15 atanga zirlai 43 lai an nei chuan zirna tha tak a nih zia a lantir a ti.

He hunah hian MZU Vice Chancellor Prof. Dibakar Chandra Deka pawhin thu sawiin, India rama Central University 56 atanga NAAC A+ Grade dawng thei tlemte zinga MZU a tel theihna tura tha thawktu zawng zawngte chungah lawmthu a sawi a. A+ grade chuan mawhphurhna nasa tak a kengtel tih sawiin, hnung tawlh lova A++ grade hmu ngei thei tura tan lak puiah kalkhawmte a sawm a ni.

(Corr: Maremi)

i<><><>

NEW MIZO IIS

Doordarshan Aizawl Asst News Editor Andrew Lalchhandama chu nimina UPSC result chhuak ah Indian Information Service (IIS) Group B Sr Grade ah a tling.

Andrew Lalchhandama hi Aizawl Nursery veng niin Pu C. Vanlalfluanga fapa a ni a, Akashvani Aizawl ah Thlirvelna hun rei tak chhung puang thinin Doordarshan lamah Editorial Assistant a ni bawk a, Dept of Mass Communication, Mizoram University atangin Master a zo a, tunah hian PhD a ti leh mek a, Mizoram Journalist Association member nilai a ni.

Andrew Lalchhandama chuan Akashvani nen an inkawmna ah hun rei tak chhung Akashvani leh DDK lama a thawhpuiten an thlawpna ah lawmthu sawiin a hnathawh chhunga a tawnhriat hrang hrang chuan tun dinhmun a thlen tir tih a sawi.

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

MANIPUR

Parliament chuan Manipur-a thla ruk dang Presidents rule puan chhunzawm rawtna a pawm. Presidents rule hi August ni 13 atanga chhiar tan tur a ni a. Lok Sabha ah he resolution hi pawm a nih hnuah vawiin khan Rajya Sabha chuan a pawum veleh a. Union Minister of State for Home Nityanand Rai chuan kumin February atang khan Presidents rule hi Manipur ah puan a nih thu sawiin hemi chhung hian tharum thawhna thleng pawh nasa takin a tlahniam tih a sawi a. Thla li liamta chhungin mi pakhat chauhin buaina chhuak kaihhnawihah nunna an chan tih a sawi a. Prime Minister Narendra Modia kaihhruaina hnuaiah hmarchhak chhuan nasa takin hma a sawn tih a sawi bawk a ni.

(Nwsonair)

PM

Vawiin khan Prime Minister Narendra Modia leh Philippines President Ferdinand Romualdez Marcos Jr.te chu vawiin khan New Delhi ah an inkawm a. Hemi hnu hian ram pahnihten thawhdunna inremna thuthlung MoU pakua an ziak. Vawiina MoU an ziah zingah Strategic Partnership te, Mutual Legal Assistance in Criminal Matter, Defence, Science and Technology te a tel a ni. Chanchinbumite hmaah Prime Minister Narendra Modia chaun Phillipines leh India inlaichinnaah President Marcos lo zin chu a pawimawh thu sawiin ram pahnihte hian an thawhdunna champha vawi 75 an thleng chiah a ni a ti bawk.

(Newsonair)